

## Pasidungog kan Ka Abdias "Omar/Badul" Guadiana



Komite nga Tagapagpatuman  
Komite han Rehiyon-Eastern Visayas  
Partido Komunista ng Pilipinas

**G**inhahatag han Komite han Rehiyon-Eastern Visayas an pinakahitaas nga Pula nga pagsaludar kan Ka Abdias "Omar" o "Badul" Guadiana, kadre han Partido, anak han Samar ngan bayani han katawhan, nga namatay hadin ika-29 han Hulyo 29, 2021.

Ha edad nga 72, namatay hi Ka Omar tungod ha impeksyon ha Covid-19. Maiha na niya nga sakit an *interstitial pulmonary fibrosis*, nga nakaa-pekto ha iya baga. Nadelatar an pag-pagawas hini nga makasurubo nga balita tungod ha grabe nga panmilitar nga operasyon han mga pwersa han pasista nga rehimen Duterte. Naduyog kami ha kasubo ha iya nabayaan nga pamilya ngan ha ngatanan nga kasama ngan masa nga iya nakatrabaho ngan nakilala.

Usa ha mga harigi han rebolusyunaryo nga kagiusan ha Eastern Visayas hi Ka Omar. Nagserbe hiya komo sekretaryo han Partido ha rehiyon ha sakob hin haros 30 katuig, tikang hadton urhi nga parte han 1985. Tikang han mapukaw komo usa nga estudyante nga aktibista hadton Sigwa han Syahan nga Kwarter (First Quarter Storm o FQS), dirudiretso niya nga ginhasog an dalan han militante

nga pakigbisog ngan ginhalad an iya kinabuhi tubtub ha iya kamatayon. Ginpamunuan niya an Partido, an hukbo han katawhan ngan an rebolusyunaryo nga kagiusan ha Samar ngan Leyte agud gitgitay nga atuhan an kada pasista nga todo-gerra han lima nga niyutiyo nga rehimen.

Gin-anak hi Ka Omar ha San Julian, Eastern Samar hadton Nobyembre 1949. Kaupod hiya ha syahan nga han-ay han mga kadre han Partido ha rehiyon. Samtang nag-aaram han *veterinary medicine* ha University of Eastern Philippines (UEP) ha Catarman, Northern Samar, nagserbe hiya komo lider han mga progresibo nga aktibista nga estudyante. Hadton 1973, ha iya ikaupat katuig ha kolehiyo, gindakop ngan ginpriso hiya ha Cebu han militar han pasista nga diktador nga Marcos.

Han makagawas, diretso hiya nga kinadto ha kabaryuhan agud igpatu-

man an saad nira han iya igkasi aktibista nga hi Efren Martires, nga magkirigta hira ha Bukid Huraw ha San Jose de Buan, Western Samar ngan ipasulong an armado nga pakig-away. Kaupod an mga kapareho niya nga hadto anay kadre han Partido nga hira Prudencio Calubid ngan Antonio Cabanatan, gintukod nira tikang ha waray an pinakasyahan nga prente gerilya han BHB ha sur-weste han Samar. Pagsakob hin dekada 1980, nag-aningal ha bug-os nga nasud an mga taktikal nga opensiba han BHB ha Samar ngan nagin usa ha mga gamhanan nga pwersa nga nagpabagsak ha diktadura nga Marcos.

Dagko an mga nagin amot ni Ka Omar ha lima kadekada niya han rebolusyunaryo nga pakigbisog ha Eastern Visayas. Komo sekretaryo han Komite han Rehiyon, ginpamunuan niya an konsolidasyon ngan pag-uswag han Partido ha natad han ideolohiya, pulitika ngan organisasyon, an pagdako ngan pagpadig-on han hukbo han katawhan, ngan an kumprehensibo nga pagpasulong han

demokratiko nga rebolusyon han katawhan sakob hin haros tulo kadekada.

Direkta niya nga ginpamunuan an mga kontrapyudal nga pakigbisog ha magkalain-lain nga parte han Western Samar, Eastern Samar ngan Leyte. Ginpamunuan niya an utro nga pagkusog han rehiyon tikang ha pauru-utro nga hiluagan nga pangatake ngan panlasurbo han mga alipures han pasista nga estado, sugad han hiluag nga pasista nga ngirhat ni Gen. Jovito Palparan. Ginkilala ngan ginundong niya ha bug-os nga rehiyon an positibo nga eksperyensya han mga kasama ha pag-ato ngan pagpakyas ha 5 kabatalyon nga panlasurbo han mga pasista nga tropa ha Northern Samar hadton ikatulo nga kwarter han 2010 tubtub 2012, diin ginlansar han BHB an serye han magdinaugon nga mga bataan nga taktikal nga opensiba nga ambul ngan reyde nga nakakumpiska hin mga armas, nakalipol han kaaway, ngan nakasamad hin damo pa nga mga pasista nga tropa. Pira na nga mga madarahug nga todo-gerra an naglabay kundi nagpabilin nga madig-on an Partido ngan an hukbo ha rehiyon, nga usa ha mga nagtatagamtam hin pinakahiluag ngan hilarum nga nakagamot nga panmasa nga suporta ha bug-os nga nasud.

Hi Ka Omar liwat an prinsipal nga nagsurat han mga importante nga dokumento sugad han sumada han rehiyon, Kurso Para ha mga Aktibista o KPA nga usa ha mga pinakabataan nga dokumento nga pirme gin-gagamit han ngatanan nga rebolusyunaryo nga aktibista, ngan mga giya ha magkalain-lain nga prinsipal nga linya han buruhaton ngan taktika ha pakigbisog. Nakabulig ini nga mga dokumento ha pag-isa han rebolusyunaryo nga praktika ngadto ha balitang han rebolusyunaryo nga teorya.

Maupay hi Ka Omar ha buruhaton pankultura. Komo tinuod nga anak han Samar, hilarum an iya kahibaruhan ha Waraynon nga kultura. Ginliwanan niya ngan han iba nga kasama han rebolusyunaryo nga mga liriko an mga popular nga dinhianon nga kanta sugad han “An Kamote” nga nagin “An BHB,” ngan an marayhak nga kanta ha pag-ani nga nagin “Taktikal nga Opensiba.” Maupay hiya magsista, kumanta, ngan sumayaw han kuratsa.

Modelo hi Ka Omar tungod ha iya mag-upay nga komunista nga kinaiya han simple nga panginabuhin ngan maduruto nga pakigbisog, pagsuson-ha-kalugaringon, ngan pakig-usa ha masa ngan kasama. Ginpailarum niya an kalugaringon ha waray hunong nga pagremolde ngan ginsalikway an mga burges ngan petiburges nga tendensiya han iya klase nga gintikangan. Gin-gamit niya an iya kahibaruhan ha *veterinary medicine* agud mag-ataman han mga kasama nga masakit ngan samaran, ngan nahimo pa niya nga mag-opera han kasama nga nabuno han ginbaydan nga ahente han pasista nga kaaway. Nag-aram pa hiya magmama agud mas mapasuok ha masa nga parag-uma.

Ha luyo han dirudilain nga ayat, sugad han grabe nga pan-gigipit ha iya han pasista nga rehimen ngan han iya sakit ha baga, nagpabilin nga puno hin rebolusyunaryo nga determinasyon ngan kadig-on hi Ka Omar. Han utro hiya nga mapriso ha Borongan Provincial Jail hadton 1985, umeskapo hiya pinaagi han paglukso ha pader nga mayda *barbed wire*, paglangoy agud tabukon an salog han Borongan bisan kun nagkasaramad an iya mga kamot, ngan pag-abot ha baryo nga mayda masusumpayan nga

yunit han hukbo agud makabalik ha rebolusyunaryo nga pakigbisog. Bisandadton pauru-utro hiya gin-aatake han sakit, waray hiya umundang ha paggios, nagpursige hiya ha pagtrabaho ha butnga han gipit nga panmilitar nga sitwasyon, ngan ginpamunuan an masa ha pag-atubang ha grabe nga pasista nga panlasurbo han kaaway. Ginhalad niya an iya bug-os nga kinabuhi para ha rebolusyunaryo nga kawsa.

Han maggrabe na gud an sakit ni Ka Omar ngan magretiro hiya ha mga responsabilidad ha Partido, waray gihapon hiya umundang ha pagsubabay ha dalagan han rebolusyunaryo nga kagiusan. Padayon hiya nga nag-sagdon ha bag-o nga mga kadre nga sinaliwan ha iya. Damo nga mga leksyon an ira nakuha ha iya, ngan bisan kun waray na hiya, padayon nga nagseserbe nga inspirasyon ha ira an iya kinabuhi.



Hi Ka Omar usa ha mga pinakamaupay nga anak han Samar. Waray pagruhaduha niya nga ginbayaan an iya klase nga gintikangan, nagremolde han kalugaringon, ngan ginhalad an iya kusog ngan kabaltok ha pag-

serbe ha masa nga tiniyupi ngan tinallumpigos. Nawarayan man kita hin usa nga harigi han rebolusyunaryo nga kagiusan, an bug-os-nga-kinabuhin nga pagserbe ni Ka Omar ngan han iba nga rebolusyunaryo ha katawhan nag-anak naman hin milyun-milyon nga katawhan nga napukaw ngan magpapadayon han makasaysayan nga pakigbisog para ha tinuod nga demokrasya ngan katalwasan. Hira an buhi nga pagpamatuod han kamahinungdanon han kinabuhi nira Ka Omar ngan han kawsa nga ginhalaran nira han ira kalugaringon. ■

### Mabuhay hi Kasamang Omar!

**Subaron an iya maranggat nga pananglitan han sakripisyo ngan bug-os nga kinabuhi nga pagserbe ha katawhan!  
Mabuhay an demokratiko nga rebolusyon han katawhan!**